

Berpolitik dengan teladan baik untuk jadi ikutan generasi muda

PENULIS ingin memberi reaksi kepada artikel 'Kematangan politik kita semakin menurun' oleh Zainul Arifin di akhbar *Berita Minggu* kelmarin. Penulis tertarik dengan pandangan beliau yang mengatakan kempen politik kita bukan untuk berlawanan ideologi, tetapi menanam kebencian dan marah.

Banyak pihak terbabit dengan gaya berpolitik sebegini. Jelasnya, kematangan berpolitik di kalangan pemimpin dan pengikut parti politik semakin menurun. Kematangan berpolitik yang semakin menurun bukan saja memberi kesan buruk kepada sistem demokrasi negara, malah turut memberi contoh buruk kepada generasi muda.

Pengalaman ketika menyertai Pertandingan Ekspo

Penyelidikan dan Ciptaan Institusi Pengajian Tinggi Antarabangsa (Pecipta 2009) mungkin dapat menyedarkan penulis betapa pemimpin yang tidak matang dan tidak bijak mengawal emosi hanya memberi contoh buruk kepada generasi muda.

Sekumpulan pelajar melawat Pecipta 2009, bertanya mengenai kajian dipertandingkan penulis. Dengan senang hati, penulis menerangkan mengenai pendekatan keagamaan dalam menangani tekanan kerja. Pecipta 2009 bertujuan mempamerkan hasil, ciptaan dan inovasi dihasilkan semua IPT di Malaysia dan juga luar negara, sambil membuka peluang kepada peserta menjalinkan silaturahim dan usaha sama bagi membangunkan prototaip

dan pengkomersialannya.

Sebaik saja penulis memberi penerangan mengenai penyelidikan itu, seorang daripada pelajar dalam kumpulan itu dengan minatnya menjelaskan alangkah baik kalau penulis dapat membuat kajian mengenai tahap emosi dan kemarahan ahli politik serta pengikut mereka ketika kempen politik.

Memandangkan kata-kata sedemikian terkeluar daripada mulut seorang pelajar sekolah menengah, penulis lantas bertanya apakah yang dimaksudkannya. Jawapan spontan dan sinis pelajar perempuan itu boleh saja dijadikan pengajaran untuk ahli politik serta pengikut mereka untuk bermuhasabah diri, terutama ketika berkempen politik.

Orang sekarang tidak berpolitik dengan bijak, jawab pelajar itu. Pergaduhan dan provokasi sering berlaku ketika kempen politik dan hari pembuangan undi. Rakan pelajar yang berdiri di sebelahnya mengiyakan kata-kata itu dengan mencelah kini pertelingkahan ahli-ahli politik antara dan sesama parti politik menjengkelkan.

Semua ini menunjukkan contoh buruk terutama kepada orang muda seperti mereka. Mereka berpendapat, contoh yang baik perlu ditunjukkan oleh ahli politik dan pengikut mereka dalam berpolitik, bukannya menunjukkan contoh buruk seperti bergaduh dan memfitnah. Negara sudah lama merdeka, tetapi mentaliti dan sikap sesetengah ahli politik dan pengikut

mereka sangat rendah.

Apa yang diperkatakan oleh kumpulan pelajar itu memang banyak kebenarannya. Jika dilihat kejadian yang berlaku ketika kempen berpolitik masa kini, tidak banyak contoh baik yang boleh diikuti golongan muda.

Mungkin sudah sampai masanya, kata hati anak muda perlu didengari orang politik yang tidak melihat dari dalaman diri apa sebenarnya tujuan mereka menceburi politik. Berpolitik bukan mengenai kepentingan peribadi, tetapi perkhidmatan dan contoh terbaik yang boleh ditawarkan kepada orang ramai termasuk golongan muda.

DR SAPORA SIPON,
Universiti Sains Islam
Malaysia Negeri Sembilan.